



Na osnovu člana 68. stav 3. Zakona o organizaciji organa uprave Federacije Bosne i Hercegovine („Službene novine Federacije BiH“ broj: 35/05), Zaključka o usvajanju Programa utroška sredstava Fonda za zaštitu okoline za 2019. godinu broj: 02-14-8906/19 od 24.05.2019.godine i Zaključka o usvajanju Izmjena Programa utroška sredstava Fonda za zaštitu okoline za 2019.godinu broj: 02-14-14587/19 od 27.09.2019.godine, Ministarstvo za prostorno uređenje, promet i komunikacije i zaštitu okoline Zeničko-dobojskog kantona, d o n o s i:

INSTRUKCIJU

o utvrđivanju uvjeta i kriterija za raspodjelu namjenskih sredstava zaštite okoliša za Lot 3

I.

Ovom Instrukcijom propisuju se uvjeti za raspodjelu sredstava po javnom pozivu, kao i kriteriji za ocjenjivanje prijave po javnom pozivu za dodjelu sredstava za realizaciju projekata iz LOT 3- Projekti iz oblasti zaštite okoliša na području Zeničko-dobojskog kantona (Podizanje svijesti o zaštiti prirode i ekološki prihvatljivog ponašanja)

II.

Dodjela sredstava se vrši po javnom pozivu. Javni poziv se objavljuje u printanim i elektronskim medijima, “Službenim novinama Zeničko-dobojskog kantona” i na zvaničnoj web stranici Ministarstva za prostorno uređenje, promet i komunikaciju i zaštitu okoline Zeničko-dobojskog kantona.

Tekst javnog konkursa sadrži:

1. Predmet javnog konkursa,
2. Uslove koje podnosioci prijave moraju ispunjavati,
3. Korisnike sredstava koji imaju pravo na podnošenje prijave,
4. Popis dokumenata koje je potrebno priložiti uz prijavu,
5. Osnovne kriterije odabira,
6. Vrednovanje projekata,
7. Opće odredbe.

Ministarstvo objavljuje javni poziv za pojedine korisnike sredstava, u pravilu najmanje jednom u kalendarskoj godini u skladu sa Programom utroška sredstava Fonda za zaštitu okoline kojeg usvoji Vlada Kantona za tekuću godinu. Javni poziv može obuhvatiti sva područja zaštite okoliša ili samo određena područja u skladu sa Programom utroška sredstava Fonda za zaštitu okoline.

Ako se na temelju prihvaćenih prijave ne iskoriste sva finansijska sredstva planirana za programe i projekte utvrđene javnim pozivom, može se tokom godine za istu namjenu raspisati novi javni poziv.

III.

Pravo učešća u javnom pozivu imaju nevladine organizacije, udruženja građana, javne ustanove, obrazovne institucije, obdaništa i medijske kuće sa područja Zeničko-dobojskog kantona.

Pravna lica kojima se dodjeljuju finansijska sredstva moraju ispunjavati sljedeće uslove:

1. Da imaju sjedište na teritoriji Zeničko-dobojskog kantona,
2. Da aplicirane projekte realiziraju/implementiraju na području Zeničko-dobojskog kantona,
3. Podnesu zahtjev za korištenje finansijskih sredstava u skladu sa objavljenim Javnim pozivom,
4. Udovoljavaju i drugim uslovima utvrđenim Javnim pozivom,

Prijave programa/projekata Korisnika dostavljaju se na posebnom prijavnim obrascu i treba da sadrže:

1. Ime aplikanta/podnosioca prijave,
2. Naziv i opis projekta,
3. Finansijske podatke o projektu koji je predmet prijave,
4. Ciljeve projekta,
5. Aktivnosti koje će se provesti da bi se postigli postavljeni ciljevi,
6. Dinamiku provođenja projekta,
7. Opis očekivanih rezultata projekta,
8. Mjerljivost ostvarenja ciljeva koji se postižu realizacijom predloženog projekta,
9. Monitoring i evaluaciju projekta.

Sredstva iz Javnog poziva dodjeljuju se na osnovu zahtjeva i obavezne dokumentacije.

Svi dokumenti koji se predaju uz zahtjev kao osnovna dokumentacija moraju biti originali ili ovjerene kopije, ne starije od 3 mjeseca.

Posebna dokumentacija mora biti pregledna, vjerodostojna i tehnički korektna.

Dokumenti koji se šalju na Javni poziv se ne vraćaju aplikantu.

Aplikanti moraju projekat realizirati na području Zeničko-dobojskog kantona.

Obavezna dokumentacija mora sadržavati:

- Prijavu projekta na Javni konkurs - popunjen i potpisan obrazac od strane odgovornog lica (preuzima se sa web stranice: www.zdk.ba/javni-pozivi).
- Ovjerenu izjavu o namjenskom trošenju sredstava (ovjerena kod nadležnog organa uprave ili notara).
- Ako se radi o sufinansiranju, ovjerenu izjavu o visini sredstava s kojima će aplikant učestvovati u sufinansiranju realizacije projekta koji predlaže (ovjerena kod nadležnog organa uprave ili notara).
- Rješenje o upisu u sudski registar/ registar udruženja/ registar organizacija (ovjerena kopija)
- Uvjerenje o poreskoj registraciji - ID broj i PDV broj ukoliko su PDV obveznici (ovjerena kopija).

IV.

Prijedlog raspodjele sredstava za Projekte iz oblasti zaštite okoliša – daje Komisija imenovana od strane ministra, cijeneći pri tome ukupan broj bodova utvrđenih na osnovu sljedećih kriterija:

1. Pripremljenost projekta u skladu sa zahtjevanim sadržajem programa (sveobuhvatnost, projektno partnerstvo, broj korisnika i obuhvat populacije, angažman volontera ili nezaposlenih, ciljna grupa kojoj je projekat namijenjen) do 20 bodova
2. Mjerljivi efekti koji se postižu predloženim projektima, kao što su: broj angažovanih članova, volontera i djece na realizaciji projekta, broj zasađenih sadnica, površina izletišta koje će se očistiti od otpada, broj izvora i površina izvorišta koja će se urediti i očistiti, količina otpada koji će se organizirano prikupljati i odlagati na tehnički uređenu deponiju, broj časova edukacije, broj lica obuhvaćenih projektom, učinak projekta na okruženje i zajednicu i dr. (do 20 bodova)
3. Realnost budžeta i eventualno vlastito učešće. (do 10 bodova)
4. Stepengroženosti okoliša u postojećem stanju, koji je predmet projektnog zadatka. (do 10 bodova)
5. Izvještavanje o utrošku sredstava dodijeljenih po osnovu prethodnih javnih poziva Ministarstva za prostorno uređenje, promet i komunikacije i zaštitu okoline Zeničko-dobojskog kantona. (do 10 bodova)
6. Referentna lista već implementiranih sličnih projekata. (do 10 bodova)
7. Rokovi za realizaciju, broj lica koja će biti angažirana na realizaciji projekta. (do 10 bodova)
8. Kvalitet javne prezentacije i promocije projekta. (do 10 bodova)

Maksimalni iznos sredstava koja se mogu dodijeliti po projektu je 5.000,00 KM.

Da bi bila prihvatljiva, prijava treba da bude ocjenjena sa minimalno 60 bodova, dok maksimalan broj bodova koji može biti dodijeljen od strane komisije koja vrši vrednovanje i rangiranje prijava iznosi 100 bodova.

Ministarstvo neće razmatrati prijave aplikanta koji nisu realizovali projekat i dostavili Ministarstvu Izvještaj o utrošku sredstava dodjeljenih po osnovu prethodnih javnih poziva ovoga Ministarstva.

V.

Vrednovanje i rangiranje projekata pristiglih na Javni poziv vrši posebna komisija koju imenuje ministar Ministarstva za prostorno uređenje, promet i komunikacije i zaštitu okoline Zeničko-dobojskog kantona. Komisija razmatra zahtjeve i dokumentaciju zaprimljenu na osnovu Javnog poziva, ocjenjuje ispunjenost uslova i kriterija za odobravanje projekta i prijedlog dostavlja ministru koji donosi konačnu Odluku o korisnicima sredstava.

VI.

Instrukcija stupa na snagu danom donošenja, a objavit će se na službenoj stranici Zeničko-dobojskog kantona.

Broj: 12-23-14752 -JP-I/19

Zenica, 11.10. 2019.godine

